

娶之丘斷髮自誓豪計寢由是獨臥一樓不履閭外敬事舅姑無怠志年八十終嘉靖二十年縣正陳澤給文付子吳相赴闕上其事奉詔旌表

吳氏姚信妻年十九信亡無子家貧勤女工以自給誓不改適節勵冰霜年九十九卒

余氏葉弘妻年十九弘死遺孕數月堅志守節雖饑粥不給終身無憂喜色年六十五卒縣令陳文靜旌其門

吳氏姚賢妻年二十夫死貧苦自守始終無二志年九十卒縣令彭适旌其門曰貞節

季氏吳埏妻年二十三寡以栢舟自誓撫諸孤辟纁佐讀有和丸晝荻之風戊子水災一隅漂沒獨其夫柩無恙人以為節孝所感子世銓世勲仕廣州通判孫鳳起鳳翔人文秀出餘慶方隆

葉氏吳化妻年十五適吳七肄業南雍得疾歸至伏簣日語葉曰吾死後汝善擇適母自苦葉泣曰君不幸誓以死從夫卒自經求死數次家人嚴守之遂絕食七日一慟而絕時年二十縣令以其事聞